

ARLEF: SI CIRIN VOLONTARIS PAR PROMОВI IL FURLAN

A saran un supuart impuartant intes ativitâts a Friûl Doc, Gusti di Frontiera e Suns Europe. Il bant al è viert ai maiôrs di etât

Di Setembar a Dicembar, come ogni an, la ARLeF - Agenzie Regjonâl pe Lenghe Furlane e sarà presint cul so bancut aes manifestazions plui impuartantis par promovî, soredu fra i zovins, la lenghe furlane, distribuint materiâi divulgatîfs, struments pe lenghe e gadgets. A chest fin, la Agenzie e vûl avalêsi de colaborazion di **une ventine di voluntaris** di destinâ al acet dai visitadôrs, ae distribuzion di materiâi, ae informazion ancje plurilengâl al public e al supuart logjistic.

I voluntaris a davuelzaran lis propriis ativitâts a titul gratuit e a colaboraran a strent cul personâl de ARLeF che al gjestis i events. Ai stes ur ven domandât di ufrî la disponibilitât a partecipâ a un percors formatîf curt (di plui o mancun 2 oris) e la presince a une o plui des prossimis manifestazions in program: ai 8/9/10/11 di Setembar par Friuli Doc (Udin); ai 22/23/24/25 di Setembar par Gusti di Frontiera (Gurize); ai 30 di Novembar e ai 1/2/3 di Dicembar par Suns Europe, festival european des arts performativis in lenghe minoritarie (Udin).

A puedin presentâ domande di partecipazion dome i maiôrs di etât. A varan la precedence i zovins dai 18 ai 40 agns, cun esperience intai rapuarts cul public e cun cognossince di une o plui di chestis lenghis, di là dal talian: furlan, inglês, todesc, sloven.

La ARLeF e ufris ai voluntaris che a vignaran sielzûts il rimbors spesis chilometric de residence ai lûcs des manifestazions, une borse regâl cun materiâi su la lenghe furlane fats e/o promovûts de Agenzie e l'atestât di partecipazion ae ativitât formative e ai events.

Lis domandis di partecipazion (che si puedin scjariâ dal web ae direzion www.arlef.it, sezion "Bant garis e avîs"), compiladis come cu va e cu lis zontis domandadis, a van inviadis ae ARLeF, **dentri di miercus ai 31 di Avost**, midiant di une di chestis modalitâts: vie PEC: arlef@certgov.fvg.it; vie pueste eletroniche: arlef@regione.fvg.it; cun consegne a man in orari di ufici li de sede de ARLeF, in vie della Prefettura 13, a Udin. Par altris domandis o informazions, si pues scrivi a arlef@regione.fvg.it, o telefonâ al numar 0432.555812.

Udin, ai 26 di Lui dal 2016

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche Tel. + 39 0432 229127 / e-mail: arlef@caltpr.it
Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<<